


輿地廣記
附札記
五





輿地廣記

附札記

(五)

歐陽忞撰

輿地廣記卷第三十一

梓州路

緊梓州春秋戰國爲蜀地秦屬蜀郡二漢晉宋齊屬廣漢郡梁末置新州西魏置昌城郡隋開皇初郡廢後改新州爲梓州大業初州廢置新城郡唐武德元年曰梓州天寶元年曰梓潼郡乾元後升爲劍南東川節度皇朝乾德四年改靜戎軍太平興國三年改安靜軍端拱二年復故今縣九

望郪縣二漢屬廣漢郡晉省之置五城縣梁置新州西魏改五城曰昌城置昌城郡隋改新州曰梓州大業初置新城郡改昌城曰郪唐置梓州其城左帶涪水右挾中江居水陸之衝要漢郪縣故城在西南有牛頭山宜君山涪水中江郪江

望中江縣晉五城縣地後周置玄武郡東有二山如龜蛇因以名焉隋開皇初郡廢改曰玄武仁壽初置凱州大業初州廢屬蜀郡唐武德三年來屬皇朝大中祥符五年改爲中江有天柱山中江

望涪城縣漢涪縣地東晉置始平郡西魏改郡爲涪城後周又改曰安城隋開皇初郡廢置安城縣十六年改爲涪城屬金山郡唐大曆十三年來屬有涪江

緊射洪縣漢郪縣地西魏置射江縣婁縷灘東六里有射江因以爲名後周改曰射洪隋屬梓州唐因之有白崖山涪水梓潼水射江

緊鹽亭縣。漢廣漢縣地。梁置鹽亭縣。西魏置鹽亭郡。隋開皇初郡廢。屬梓州。唐因之。有負戴山。

中通泉縣。漢廣漢縣地。後置涌泉縣。及西宕渠郡。西魏改郡曰涌泉。隋開皇初郡廢。改縣曰通泉。屬梓州。唐因之。廣漢縣。二漢屬廣漢郡。晉爲郡治。宋徙郡治雒。元魏改縣曰廣魏。後改曰光漢。隋開皇初省入通泉。有涌泉山。涪水。

中飛鳥縣。漢郫縣地。隋開皇中置飛鳥鎮。因升爲縣。因山爲名。唐因之。有哥郎山。郫江。

中銅山縣。漢郫縣地。其南可象山。西北私鎔山。皆有銅。唐正觀二十三年置鑄錢官。調露元年罷。而析郫飛鳥置銅山縣。有飛鳥山。會軍堂山。郫江。

中下東關縣。蜀置招萇院。皇朝乾隆四年以其地置東關縣。有鼓樓山。楊桃溪。

安泰尉司。本永泰縣。唐武德四年析鹽亭及劍州之黃安。閬州之西水置。皇朝熙寧五年省爲鎮。入鹽亭。十年復置永泰尉司。後改曰安泰。

都督府遂州。春秋戰國爲蜀地。秦屬蜀郡。二漢及晉屬廣漢郡。東晉桓溫平蜀於德陽界東南置遂寧郡。宋因之。齊梁曰東遂寧。後周置遂州。改郡曰石山。隋開皇初郡廢。大業初州廢。置遂寧郡。唐武德元年曰遂州。天寶初曰遂寧郡。皇朝因之。今縣五。

望小溪縣。漢廣漢縣地。東晉置遂寧郡。齊梁置東遂寧。置小溪縣。西魏改縣曰方義。後周置遂州。改郡曰石山。隋復爲遂寧郡。唐復爲遂州。皇朝太平興國元年復改縣曰小溪。有銅盤山。涪江。

望蓬溪縣。本唐興縣。唐永淳元年。析方義置。長壽二年。曰武豐。神龍元年。復故名。景龍二年。析置唐安縣。先天二年。省。天寶元年。改唐興曰蓬溪。有賓王山、蓬溪。

緊長江縣。本巴興縣。東晉置。西魏改曰長江。隋唐因之。有明月山、鳳凰川、涪江。

緊青石縣。本晉興縣。東晉平蜀置。屬巴西郡。西魏改曰始興。後又曰青石。隋唐因之。有青山。出青石。可以爲磬。有涪江。

中途寧縣。唐景龍元年。以故廣漢縣地置。有梵雲山、大安溪。

中果州。春秋。戰國。爲巴子地。秦屬巴郡。二漢因之。晉屬巴西郡。宋置南宕渠郡。齊、梁、後周、因之。隋開皇初。郡廢。屬隆州。大業初。屬巴西郡。唐武德四年。置果州。天寶元年。曰南充郡。皇朝因之。今縣三。

望南充縣。本二漢安漢縣。屬巴郡。晉屬巴西郡。宋屬南宕渠郡。隋開皇十八年。改縣曰南充。唐置果州。流溪鎮。唐開耀元年。析南充置流溪縣。皇朝熙寧六年。省入南充。有果山、嘉陵江。

望西充縣。唐武德四年。析南充置。有西充山、西溪水。

上相如縣。漢安漢縣地。梁置梓潼郡。西魏廢郡置相如縣。縣南二十里有司馬相如故宅。因以名焉。隋屬巴西郡。唐武德四年。來屬。有琴臺鎮、龍角山、嘉陵江。

上資州。春秋。戰國。爲蜀地。秦屬蜀郡。二漢屬犍爲郡。晉、宋、齊、因之。後周自今陽安徙資州治此。及置資中郡。隋開皇初。郡廢。大業初。州廢。置資陽郡。唐武德元年。改爲資州。天寶元年。曰資陽郡。皇朝因之。今縣四。

緊盤石縣。本二漢資中縣。屬犍爲郡。晉宋齊因之。後周徙資州治此。及置資中郡。而改資中縣爲盤石。隋置資陽郡。唐爲資州。月山、丹山、銀山三鎮。皆故縣。隋義寧二年同置。屬資陽郡。唐屬資州。皇朝乾德五年。並省入盤石。有盤石山、中江。

緊資陽縣。後周析資中置。隋屬資陽郡。唐屬資州。有獨秀山、資水。

中下龍水縣。漢資中縣地。隋義寧二年置。屬資陽郡。唐屬資州。有龍水。

下內江縣。漢資中縣地。後周於中江水濱置漢安。成遂改爲中江縣。隋改曰內江。屬資陽郡。唐屬資州。有中江、資水。

上普州。春秋戰國爲巴蜀之境。秦屬巴蜀二郡。二漢屬巴犍爲二郡。晉李雄亂後。爲羌夷所據。至梁乃招撫之。置普慈郡。後周置普州。隋開皇初郡廢。大業初州廢。屬資陽郡。唐武德三年置普州。天寶元年曰安岳郡。皇朝因之。今縣三。

中下安岳縣。漢墊江縣地。屬巴郡。後周置安岳縣。及置普州。隋大業初州廢。唐復置普康鎮。本永康縣。後周置。屬普慈郡。隋屬普州。開皇十八年改曰隆康。大業初屬資陽郡。唐屬普州。先天元年改曰普康。皇朝乾德五年省入安岳。有安岳山、岳陽溪。

下安居縣。漢牛鞞縣地。屬犍爲郡。後周置柔剛縣。及安居郡。隋開皇初郡廢。屬普州。十八年改爲安居縣。大業初屬資陽郡。唐屬普州。崇龜鎮。本隆龜縣。唐武德三年置。先天元年改曰崇龜。皇朝乾德五年省。

入安居。有柔剛山、崇龜山、安居水。

下樂至縣。漢資中縣地。屬犍爲郡。唐武德三年。置普慈鎮。本梁置普慈郡及多業縣。後周因之。隋開皇初。郡廢。十三年。改縣爲普慈。屬普州。大業初。屬資陽郡。唐屬普州。皇朝乾德五年。省入樂至。有婆娑山、樂至池。

上昌州。春秋、戰國、爲巴蜀之境。秦屬巴、蜀二郡。二漢及晉屬巴、犍爲二郡。隋屬資陽、瀘川、涪陵三郡。唐屬資、普、瀘、合四州。乾元二年。析置昌州。大歷六年。州縣廢。其地各還故屬。十年。復置。後曰昌元郡。皇朝因之。今縣三。

上大足縣。本合州巴川縣地。唐置。屬昌州。光啓元年。州徙治焉。及以普州普康縣地置靜南縣。屬昌州。後省入。有牛鬪山、大足川。

上昌元縣。本資州內江縣地。唐置。爲昌州治。光啓元年。州徙治大足。有葛仙山、賴波溪。

上永川縣。本瀘州瀘川縣地。唐置。屬昌州。亦得渝州璧山縣地。有綾錦山、侯溪。

上敘州。春秋、戰國、爲夔侯國。秦屬蜀郡。漢置犍爲郡。東漢、晉、宋、齊皆因之。梁兼置戎州及六同郡。後周因之。隋開皇初。郡廢。大業初。州廢。置犍爲郡。唐武德元年。復曰戎州。天寶元年。曰南溪郡。皇朝政和四年。改名。今縣二。

上宜賓縣。本夔侯國。秦曰夔道。漢置犍爲郡。初治犍縣。後徙治此。東漢又徙武陽。而以夔道爲屬縣。梁置

戎州。隋置犍爲郡。唐復置戎州。初治南溪。正觀中徙治犍道。長慶中復治南溪。皇朝又治犍道。政和四年改縣曰宜賓。故犍道縣在馬湖江會。漢武帝使縣令開西南夷。勞費無成。使者唐蒙斬之。乃鑿石開道。以通南中。今石門是也。宜賓鎮本郤縣。隋末置屬戎州。唐天寶元年改爲義賓。皇朝太平興國元年改曰宜賓。熙寧四年省。故開邊縣。漢犍道縣地。隋開皇六年置屬戎州。唐正觀四年屬南通州。八年來屬皇朝。乾德五年省入犍道。故歸順縣。唐聖歷二年分郤縣置。以處生獠。乾德五年省入犍道。有黃泉山。大江馬湖江馬湖之上源曰若水。出旄牛激外。東南流。鮮水注之。又東南逕大花。與繩水合。又南逕邛都。又南逕會無。孫水注之。又南逕遂久。蜻蛉水注之。又南逕三絳。淹水注之。又與母血水合。又東逕姑復。涂水注之。又東逕馬湖。爲馬湖水。又東北至朱提。與瀘水合。而瀘水上流有蘭倉水。出博南。東北流。會類水。禁水。北注瀘津。自朱提以下通爲瀘水。又東北至犍道。入于大江。

中南溪縣。漢犍道縣地。梁置南廣縣及六同郡。隋開皇初郡廢。仁壽初改縣曰南溪。屬戎州。唐因之。有平蓋山。大江馬湖江。漢志云。南廣有汾關山。符黑水所出。北至犍道。入江。卽今南廣溪也。梁以此縣爲南廣。蓋取其名耳。

上瀘州。春秋戰國爲巴地。秦屬巴郡。二漢屬犍爲郡。蜀章武元年立江陽郡。晉宋齊梁因之。梁兼立瀘州。後周因之。隋開皇初郡廢。大業初州廢。爲瀘川郡。唐武德元年曰瀘州。天寶元年曰瀘川郡。皇朝因之。今縣三。

中瀘川縣。本江陽縣。二漢屬犍爲郡。蜀屬江陽郡。晉爲江陽郡治焉。梁立瀘州。隋開皇初。郡廢。大業初。立瀘川郡。改縣曰瀘川。唐因之。爲瀘州治。有大江、內江、內江上源曰洛水。縣據江洛會。枕帶雙流。

中江安縣。本漢安縣。東漢置。屬犍爲郡。蜀爲江陽郡治。晉、宋、齊、梁、後周皆因之。隋屬瀘州。開皇十八年。改曰江安。唐因之。故縣水縣。漢江陽縣地。梁置。屬江陽郡。隋屬瀘州。唐因之。皇朝乾德五年。省入江安。有方山、大江、綿溪。

中合江縣。本漢符縣地。屬犍爲郡。武帝使唐蒙將萬人。從巴符關入夜郡。卽此。東漢曰符節。晉復曰符。江陽郡。後置安樂縣。後周改爲合江。隋屬瀘州。唐因之。有安樂山、安樂溪。漢志。南廣有大涉水。北至符入江。卽此水也。縣在安樂水會。

中合州。春秋、戰國爲巴地。秦屬巴郡。二漢、晉因之。宋置東宕渠郡。齊、梁因之。西魏改爲墊江郡。兼置合州。後周因之。隋開皇初。郡廢。改州曰涪州。大業初。州廢爲涪陵郡。唐武德元年。曰合州。天寶元年。曰巴川郡。皇朝因之。今縣五。

中石照縣。本墊江縣。二漢、晉屬巴郡。東晉寧康二年。桓石虔破符堅將姚長於墊江。卽此。宋、齊、梁爲東宕渠郡。西魏改郡爲墊江。縣曰石鏡。及置合州。隋爲涪州涪陵郡。唐爲合州。皇朝乾德三年。改縣曰石照。有銅梁山、嘉陵江。

中漢初縣。梁置新興郡。西魏改郡曰清居。而置漢初縣。隋開皇初。郡廢。屬合州。唐因之。有江陵山、嘉陵江。

中巴川縣。唐開元二十三年。析石鏡銅梁置。屬合州。有小安溪、巴川。中下赤水縣。隋開皇八年。析石鏡置。屬合州。唐因之。有朝霞山、赤水。

中下銅梁縣。唐長安三年置。屬合州。有銅梁山、悅池。

下榮州。春秋戰國爲蜀地。秦屬蜀郡。二漢、晉、宋立南安郡。後廢。隋屬資陽郡。唐武德元年立榮州。天寶元年曰和義郡。皇朝因之。今縣四。

中下榮德縣。本旭川。唐正觀元年。析大牢置。屬榮州。永徽二年。州自大牢徙於此。皇朝治平四年。改爲榮德。公井鎮。後周置。唐武德元年。改爲縣。而立榮州治此。正觀元年。州徙大牢。皇朝熙寧四年。省入榮德。有榮德山、大牢溪。

中威遠縣。隋開皇初。以威遠戍置資州。唐武德元年。來屬。正觀元年。析置婆日。至如。二縣。二年。以瀘州之隆越入焉。故和義縣。隋末置。屬瀘州。正觀八年。來屬。皇朝乾德五年。省入焉。有鐵山、中江。中下資官縣。隋末置。屬嘉州。唐武德六年。來屬。有白崖山、滄斯水。

中下應寧縣。本大牢。隋開皇十三年置。屬資州。唐武德元年。來屬。六年。州自公井徙治於此。永徽二年。徙治旭川。景龍二年。省雲州及羅水、雲川、胡連三縣入焉。天寶元年。更名。有應靈山、應靈水。

下渠州。春秋戰國爲巴地。秦、二漢屬巴郡。晉初屬巴西郡。惠帝分置宕渠郡。宋齊屬巴渠郡。梁立渠州。西魏立流江郡。後周因之。隋開皇初。郡廢。大業初。州廢。爲宕渠郡。唐武德元年。曰渠州。天寶元年。曰流江郡。

皇朝因之。今縣三。

緊流江縣。本宕渠。二漢屬巴郡。蜀屬巴西郡。晉惠帝立宕渠郡。後廢。梁立渠州。西魏立流江郡。及置流江縣。隋曰宕渠郡。唐曰渠州。故大竹縣。唐久視元年。分宕渠置屬蓬州。至德二年。來屬。寶曆元年。省入潯山。後復置。皇朝景祐二年。省入焉。有宕渠山。流江。古寶城。流江。卽渝水也。夾水上下皆寶民所居。漢高祖入關。從定三秦。其人勇健。好歌舞。帝愛習之。所謂巴渝舞是也。

下潯水縣。梁置潯水縣。及立潯州。西魏立潯山郡。隋開皇初。郡廢。屬渠州。唐武德元年。屬潯州。三年。來屬。寶曆元年。省入潯山。後復置。有潯水。

下潯山縣。唐武德元年。析潯水置。及立潯州。八年。州廢。來屬。有潯山。涅水。

同下州懷安軍。春秋。戰國。爲蜀地。秦屬蜀郡。二漢屬廣漢郡。晉屬新都郡。西魏立金淵郡。後周郡廢。隋屬蜀郡。唐屬簡州。皇朝乾德五年。立懷安軍。今縣二。

望金水縣。漢新都縣地。東晉朱齡石於東山置金淵戍。西魏置金淵縣。及立郡焉。隋屬蜀郡。唐武德元年。避高祖名。改曰金水。皇朝立懷安軍。有金臺山。中江。

望金堂縣。唐咸亨三年。析雒新都置。屬益州。垂拱二年。屬漢州。皇朝乾德五年。來屬。有金堂山。中江。同下州廣安軍。春秋。戰國。爲巴地。秦。二漢。屬巴郡。晉屬巴西郡。後屬宕渠郡。宋。齊。屬巴渠郡。西魏流江。宕渠。墊江。三郡。隋屬宕渠。巴西。涪陵。三郡。唐屬渠。果。合。三州。皇朝開寶二年。置廣安軍。今縣三。

中渠江縣。本始安縣。宋置。屬巴郡。西魏屬流江郡。隋開皇十八年。改曰賓城。屬宕渠郡。匕夷謂貨布曰賓。故謂之賓人。唐武德元年。曰始安。屬渠州。天寶元年。改曰渠江。皇朝開寶二年。來屬。有富靈山。渠江。緊岳池縣。萬歲通天二年。析南充。相如置。屬果州。皇朝開寶二年。來屬。有安岳山。岳池水。

中新明縣。唐武德三年。析石鏡置。屬合州。皇朝開寶二年。來屬。有龍池山。嘉陵江。

長寧軍。蓋漢犍爲郡之漢陽縣地。唐置羈縻長寧等十州。隸瀘州都督府。皇朝置清井監。屬瀘州。熙寧八年。夷人獻納十州地以屬焉。政和四年。改置長寧軍。

富順監。自齊梁以前。地理與瀘州同。後周置富世縣。以富世鹽井爲名。及立洛源郡。隋開皇初。郡廢。屬瀘州。唐正觀二十三年。改縣曰富義。皇朝乾德四年。以其地置富義監。太平興國元年。改曰富順。治平元年。置富順縣。熙寧元年。省。

輿地廣記卷第三十二

利州路

次府興元府。春秋屬蜀。戰國屬楚。秦惠王立漢中郡。二漢因之。高帝始封漢王。都此。建安中。爲張魯所據。改曰漢寧。曹公克魯。復曰漢中。蜀劉備破魏將夏侯妙才。遂有其地。以爲重鎮。漢中常以巴蜀扞蔽。故劉備初得漢中。曰。曹公雖來。無能爲也。是以巴蜀有難。漢中輒沒。自公孫述。劉備。李雄。譙縱。據蜀。漢中皆爲所陷。魏末平蜀。兼立梁州。晉宋齊梁皆因之。西魏亦立梁州。及立漢中郡。後周末。改郡曰漢川。隋開皇初。郡廢。大業初。州廢。復置漢川郡。唐武德元年。曰梁州。開元十三年。改曰褒州。二十年。復故名。天寶元年。曰漢中郡。後升山南西道節度。興元元年。德宗巡幸。升爲興元府。皇朝因之。今縣四。

次赤南鄭縣。故褒之附庸。周時。鄭桓公死於犬戎。其民南奔。居此。因曰南鄭。顯王之世。蜀有其地。至六國。楚人兼之。懷王衰弱。秦略取焉。自秦以來。皆爲漢中郡治。項羽封漢高帝爲漢王。蕭何曰。天漢。美名也。遂都南鄭。大城周四十二里。內有小城。南憑北結。環雉金墉。漆井。皆漢所修築。地沃而川嶮。曹公既克張魯。方之鷄肋。謂得之無可用。而棄之爲可惜也。蜀先主以魏延。後主以蔣琬。姜維。相繼守之。魏末。平蜀。兼立梁州。晉以後皆因之。齊建武二年。蕭懿爲刺史。魏將元英。率兵十萬。通斜谷。圍南鄭。懿拒守百餘日。不拔而退。梁天監三年。刺史夏侯道遷以地入魏。大同元年。魏刺史元羅復以地入梁。承聖二年。

尉遲向平蜀。乃入西魏焉。後周末。改郡曰漢川。隋唐因之。後爲興元府。朱梁時。王建得其地。後唐克之。又爲孟知祥所有。周顯德中。節度使張虔釗以地歸附。有玉女山、黃牛山、中梁山、仙臺山。漢水有胡城。漢張騫使匈奴。與胡妻及堂邑父俱還漢中。築城以居也。晉義熙十五年。城上有密雲、五色昭章。及曉。城崩半許。淪漢。出銅鍾十二枚。以爲宋室之瑞。

次畿城固縣。二漢屬漢中郡。蜀改爲樂城。晉復故。及宋、齊、梁、西魏、後周。皆屬漢中。隋屬漢川郡。唐屬梁州。武德二年。改曰唐固。正觀二年。復故。有通關山。古曰通關勢。山高百餘丈。上有匈奴城。方五里。濬塹三重。漢王北定三秦。蕭何守漢中。欲修此道。以通關中。故名爲通關勢。有黑水。出北山。南流入漢。諸葛亮牋云。朝發南鄭。暮宿黑水。謂此有韓信臺。卽漢高帝置壇。設九賓之禮。以拜信爲大將。

次畿褒城縣。故褒國。周幽王后褒姒生於此。漢元鳳六年。置褒中縣。及東漢晉。皆屬漢中郡。隋開皇初。曰褒。內屬梁州。仁壽元年。因失印。更給。改曰褒城。義寧二年。改曰褒中。唐正觀三年。復曰褒城。屬梁州。漢陽平關在西北。有石牛山。山有小石門。穿山通道六丈有餘。昔秦欲伐蜀。而不知道。乃作五石牛。以金置尾下。言能糞金。欲以遺蜀。蜀王負力而貪。令五丁開道引之。秦因使張儀司馬錯。以兵尋路滅蜀。謂之石牛道。東漢永平中。司隸校尉犍爲楊厥。又鑿而廣之。蜀都賦所謂阻以石門。是也。有女郎山。上有女郎冢。女郎廟。俗言張魯女所葬。有褒水。西北出衙嶺山。東南逕大石門。歷故棧道下谷。蜀諸葛亮死於五丈原。魏延先退而焚之。卽此褒水。又南。逕三交城。又東南。得丙水口。又東南。歷小石門。又東南。歷

褒谷之南口。又東南。歷褒城縣東。又南。入于漢水。

次畿西縣。本沔陽縣地。二漢、晉、宋皆屬漢中郡。後省。元魏置嶓冢縣。後周因之。隋大業初。改爲西縣。屬漢川郡。唐武德三年。置褒州。八年。州廢。來屬。有沔陽故城在西。漢蕭何所築。劉備北定漢中。卽漢王位於此。有西樂故城在西南。甚險固。蜀諸葛亮所築。晉梁州刺史楊亮守之。爲符堅所破。後刺史姜守潘猛亦相仍居此。城側有客裘溪水。北流入漢。今謂之洛水。有定軍山在東南。曹公克漢中。命夏侯淵守之。劉備自陽平關南渡沔水。破斬淵於此。諸葛亮將死。遺令葬此山。不起墳隴。唯深松茂柏。欒蔚川阜。莫知墓所在。山東地名高平。有亮廟。蜀步兵校尉習隆等所表立也。有張魯城在西。魯沛國張陵孫也。行五斗米道。劉焉以爲督義司馬。住漢中。因竊據焉。有湔水。北發武都氏中。南逕城東。又南逕張魯治東。又南流入沔。謂之湔口。張魯治。謂仙官所治也。有白馬山。舊有張天師堂。今曰湔口化。有百牢關在西南。

都督府利州。春秋、戰國爲蜀地。秦屬蜀郡。二漢屬廣漢郡。蜀先主分屬梓潼郡。晉孝武分立晉壽郡。宋齊因之。後魏兼立益州。世號小益州。梁曰黎州。西魏復曰益州。又改曰利州。隋開皇初。郡廢。大業初。州廢。爲義城郡。唐武德元年。曰利州。天寶元年。曰益昌郡。王蜀知昭武軍節度。後唐改郡曰益州。皇朝因之。景祐四年。改寧武軍。今縣四。

中綿谷縣。故葭萌縣。本蜀王弟葭萌所封。爲苴侯邑。史記所謂苴蜀相攻是也。二漢屬廣漢郡。劉備改曰

漢壽屬梓潼郡。晉太康元年改曰晉壽。太元十五年立晉壽郡。宋分置興安縣。後復併焉。而改晉壽曰興安。後魏兼立益州。西魏曰利州。隋開皇十八年改興安曰綿谷。唐因之。有龍門山、嘉陵江、潛水、綿谷、中葭萌縣。漢舊縣地。東晉安帝置晉安縣。屬新巴郡。宋齊因之。元魏爲郡治焉。隋開皇初郡廢。十八年改晉安縣曰葭萌。屬利州。唐因之。有嘉陵江。

中下嘉川縣。漢葭萌縣地。宋置興樂縣。及宋熙郡。元魏改縣爲嘉川。隋開皇初郡廢。屬利州。唐武德二年屬靜州。正觀十七年州廢。來屬故平蜀縣。本義城。西魏置。隋屬利州。義寧二年改曰義清。唐武德七年置南平州。正觀二年州廢。來屬天寶元年改曰胤山。皇朝乾德三年改曰平蜀。熙寧三年省入嘉川。有石鷲山。

下昭化縣。漢葭萌縣地。宋置益昌縣。屬白水郡。隋唐屬利州。皇朝開寶五年改爲昭化。白水鎮。故白水縣地。二漢屬廣漢郡。晉屬梓潼郡。孝武分屬晉壽郡。別置平州縣。宋曰平周。後又曰平興。置白水郡。後改縣爲白水。而改郡爲平興。隋開皇初郡廢。復改縣爲平興。屬利州。十八年又改爲景谷。唐武德四年置沙州。正觀元年州廢。來屬寶曆元年省。尋復置。其後又省爲白水鎮。

望洋州。春秋戰國爲楚地。秦屬漢中郡。二漢晉宋齊梁皆因之。元魏立洋州。及洋川、儻城二郡。隋開皇初郡並廢。大業初州廢。屬漢川郡。唐武德元年立洋州。天寶元年曰洋川郡。王蜀升武定軍節度。皇朝景祐四年改武康軍。今縣三。

望興道縣。漢城固縣地。蜀以爲重鎮。後主延熙中。將軍王平守興勢。魏將曹爽攻圍不克。卽此地也。元魏置興勢縣。及立儻城郡。隋初。郡廢。屬洋州。後州廢。屬漢川郡。唐初。屬洋州。正觀二十三年。更名興道。天寶十五載。州自西鄉徙治於此。壻水鎮。因仙人唐公房之壻所居得名。有興勢山。漢水。壻水。水北發聽山。南流入漢。有駱谷路。南口曰儻谷。北口曰駱谷。通長安。唐德宗僖宗幸興元。皆出此。

上西鄉縣。漢城固縣地。蜀置南鄉縣。晉太康二年。改曰西鄉。及宋齊梁。屬漢中郡。元魏改縣曰豐寧。立洋州。及洋川郡。隋初。郡廢。屬洋州。後州廢。屬漢川郡。唐初。立洋州。天寶十五載。州徙治興道。故洋源縣。唐武德四年。析西鄉置寶曆元年省。故定遠城在南東。漢班超封定遠侯。卽此。有雲亭山。洋水。水導源巴山。東北流。逕西鄉。又東北流入漢。漢戚夫人生於洋川。高帝寵之名其川曰洋。以表誕生之休。洋也。

中興符縣。本華陽縣。唐開元十八年。析興道置。天寶三載。省。八載。開清水谷路。復置。因鑿山得玉冊。改爲眞符。屬京兆府。十一載。來屬。故黃金縣。漢安陽縣地。屬漢中郡。有黃金谷。因置黃金戍。黃金戍。張魯所築。南接漢川。北枕古道。險固之極。昔氏王楊難當。令魏興太守薛健據黃金。宋秦州刺史蕭思話。使陰平太守蕭坦攻拔之。卽此。西魏置縣。屬儻城郡。隋屬漢川郡。唐屬洋州。皇朝乾德四年。省入眞符。有寒泉山。黃金水。

上閬州。春秋。戰國。爲巴地。秦。二漢。屬巴郡。建安六年。益州牧劉璋分立巴西郡。晉。宋。齊。因之。梁立巴州。及北巴郡。西魏。平蜀。立隆州。及盤龍郡。後周因之。隋開皇初。郡廢。大業初。爲巴西郡。唐武德元年。爲隆州。先